

07-14

1938

P

Lifi landsbygðin - Ráðstefna Kvennalistans um atvinnu- og byggðamál - Fréttatilkynning

Helgina 28. og 29. maí sl. var haldin á Hvanneyri í Borgarfirði ráðstefna um atvinnu- og byggðamál á Íslandi. Markmið ráðstefnunar var að kynna á sem fjölbreytilegastan hátt stöðu fólks á landsbyggðinni og hvetja konur til að vinna að uppbyggingu atvinnulífs á eigin forsendum. Dagskráin var byggð upp á erindum, fyrirspurnum, hugmyndasöfnun og hópvinnu.

Ráðstefnan var öllum opin og sóttu hana milli 50 og 60 manns viðs vegar að landinu, flest konur. Margar konur komu með börn sín með á ráðstefnuna því barnagæsla var skipulögð meðan dagskrá stóð yfir. Þetta fyrirkomulag reyndist ákaflega vel og gerði mörgum konum kleift að sækja ráðstefnuna sem ella hefðu ekki komist.

Á dagskrá voru erindi um stöðu dreifbýlis á Íslandi og hugsanleg úrræði, um atgerfisflótta og sjálfsímynd landsbyggðarinnar, um þátttöku og úrræði kvenna í atvinnuuppbyggingu bæði á Íslandi og á hinum Norðurlöndunum og fræðileg erindi um verkaskiptingu kynja í ýmsum þjóðfélögum og menntun kvenna. Báða dagana var unnið í hópvinnu, þann fyrri að söfnun hugmynda um atvinnuuppbyggingu og þann síðari að frekari útfærslu nokkurra þeirra hugmynda sem fram komu fyrri daginn.

Niðurstöður þessarar ráðstefnu urðu þær að konur hafa miklu hlutverki að gegna í atvinnuuppbyggingu og þurfa sjálfar að taka frumkvæði á sínum heimaslöðum til að upp rísi atvinnufyrirtæki sem aðlöguð eru þörfum og hæfileikum kvenna. Nokkrar konur fóru heim með hugmyndir að slíkum fyrirtækjum í farteskinu.